

宣
美
州
志

卷五

藝文

文詩
雜記

藝文志文

龍門洞記

宋蘇在廷

自蜀至京四千餘里幾半天下自利至興行五百里幾半蜀道自興三泉西行大道不能百里又自大道南行支徑不能百步山舒水湧少焉突有若觀闕者當其前迫而視之則龍門洞也其深七十三步廣半之其兩傍石壁之嵌空突怒者若耳目鼻口鱗甲跟肘俱具其下皆石爲底水紋其上若鋪筦簞石墮其閒若設俎豆其兩巖瘦木翠蔓附石草生歲蕤下覆若綴纓絡木蔓之

聞布水十道後先交映若垂冕旒水落石底其勢跳瀉
與石相關若濺踏雪其聲鏘鳴與洞相應若響琴筑寒
清遶幽迥非人境予不能盡名其狀蓋造物者專爲是
瑰詭以聳世俗天地間一尤物也循洞南升石斷山分
有土田甚沃有竹箭檜柏松栲雜他卉木甚茂野人居
之若桃花源者少西而升不百步泉湧地中清冷滑甘
委蛇東下及洞之額而落洞不知所出相傳有蜃龍騰
去壁巖掀麓而爲此也故名云水出洞中北合嘉陵大
江深不可涉潛化閒縣令錢侯泳始闢爲遊宴之所橋

於南北閣於下館於東亭榭臺圃於西以便遊者又南而升路益險山水益秀復得洞若重檐夏屋有石牀甚古然以道惡絕無人遊歲大旱取湫水輒應疑龍之所家以前洞爲門閭而此其堂奧予蜀人往來凡十數過過未嘗不遊遊未嘗不飲酒賦詩而去洞中水石草木皆若舊識予同年友李侯請爲記予聞之山川無知以人爲榮辱峴山雖卑以叔子而顯冉溪雖秀以子厚而愚今茲洞之奇冠天下非得奇文無以稱夫文人之過其下者相躡也而獨以屬愚何哉嗟夫靈壁之石天下

奇翫也蓋僅有巖穴處耳以其近於中都故取重當時
甚至一拳之微價累千金而彌不可得其亦巧於效技
也此洞豈特百倍於靈壁乃蒼然獨秀於遠方不效技
於王公貴人之前徒爲田夫漁父之所簡賤高人逸士
之所耽翫蓋其拙有類予者予與舊識而辱之以予文
不知山靈尚許之否

禹王廟記

明舒鵬翼

嵎冢山禹王廟成漢中府倅張侯良知甯羌州守蕭君
遇祥書來請予記予惟古聖賢之在當時有大功德於

民者皆得立廟祀之朝廷履道建中盡倫定制毀淫翼
正靡神不宗夏后氏紹堯舜精一之傳開子孫帝王繼
續之統五帝讓功三王推德可千萬世祀之乃於大厯
服之

句有訛誤
存俟查校

九年詔有司立廟京師奠玉鬯牛遣官

攝祭載登法典與祚相承若茲廟也予過屢矣南去州
百里許東去府二百里許鳥迹獸蹏通於官道歲時伏
臘疇薦蘋蘩雖不建可也張侯書云禹都安邑安邑有
廟崩於會稽會稽有廟惟是嵎豳漢江發源禹實經焉
廟何可廢蕭守書云鼈靈治蜀水蜀人祀之西門豹治

鄴鄴人祀之惟是嵒冢故祠遺址禹實妥焉祀惡得乏
乎予憮然喟曰昔眉山蘇軾撰韓昌黎廟碑謂公之神
如水之在地中鑿井得泉豈顓在是則夫覩河興思探
穴增感所從來遠矣肆今之葺而廟廟而祀也允宜爾
哉顧小子墮落歲深荒述日久大懼不能侈一辭以發
聖之蘊然願竊附姓名於石以垂無疆謹稽首頓首再
拜而記其略曰當堯之時洪水滔天民遭陷溺茹毛飲
血厥食維艱堯有憂焉舉禹治之俾繩鯀業禹自冀州
梁岐太原岳陽覃懷至於衡漳又自積石龍門壺口雷

首底柱析城至於王屋又自嶧冢荆山內方大別衡山
敷淺雲夢至於彭蠡蓋不敢墮塞汨亂以取震怒故浩
浩蕩蕩東注江海禹可謂智矣禹傷先人父鯀以功不
成廼手足胼胝居外十三年過門不敢入生啟不得子
惡衣菲食陸行乘車水行乘船泥行乘橇山行乘櫓惟
曰孳孳排決濬淪弗遑甯處禹可謂孝矣方其隨山刊
木鬼神龍蛇護惜巢穴作爲妖怪風沙晝暝迷失道路
禹乃仰望咨嗟俄見上帝授以太上先天呼召萬靈之
書且令其臣狂章虞餘黃魔太醫庚辰童律爲之助

是能呼吸風雷役使神物得意開鑿之志禹可謂神矣
四隩既宅九州攸同稷得以播百穀契得以敷五教垂
得以司百工皋陶得以明五刑伯夷得以典三禮后夔
得以正五音龍得以主賓任土作貢勞而不伐禹可謂
功矣是故天錫洪範殪禪帝位致彝倫之攸敘會諸侯
於塗山而下民底定萬世永賴孔子曰禹盡力乎溝洫
吾無閒然矣劉定公曰洪水橫流微禹吾其魚乎嗚呼
禹之功史雖載之而不知其由於孝禹之智人能言之
而不知其由於神合智與神謂之聖合功與孝謂之德

德且聖庶幾其記禹哉復作九歌俾士人誦之以侑饗
祀歌曰涿水傲堯兮汜濫國中四岳薦禹兮俾爲司空
禹治水兮注之東方拯橫流兮爲民粒食言乘四載兮
勞身焦思克蓋前愆兮萬世之利聲爲律兮身爲度其
言可信兮其仁可附庶土交正兮底慎財賦不自滿假
兮拜昌言聲教訖兮奠黎元水土平兮生齒繁洛出書
兮錫九疇通九道兮開九州亶亶穆穆兮六府孔修娶
塗山兮辛壬啟呱呱兮何心荒度土功兮五服弼成應
歷數兮帝命赫泣罪人兮痛自責舞干羽兮有苗格輯

五瑞兮建皇極朝玉帛兮會萬國戮防風氏兮明黜陟
宅百揆兮股肱良敷文命兮庶事康於堯舜兮大耿光

金牛峽賦

國朝劉 棨

伊維鴻蒙既闢兩儀判形山谷異位高下殊情或峻極
於霄漢或深入乎窅冥或險而有鳥道之號或邃而有
鬼窟之稱幽潛沈鬱突兀崢嶸固職方氏不能窮其數
山海經不能悉其名者也若夫聳峭壁立崎削天然隱
蔽日月吞吐雲煙盡乾坤之奧妙成宇宙之大觀孰如
金牛峽之險亙古今而無前以彼峽峙兩山中通一線

危石巉巖魂搖目眩仰視則長空如帶驚翠巒之欲合
環顧則崇墉如削疑赤壁之互見哀行人兮地底羨松
根兮天半極世境之酷烈兮已令人却步而思返又爲
誰設此永巷兮長逶迤而不斷當其一天霽色萬里晴
光亭亭日午倏爾輝煌撫清暉兮載路思白晝兮正長
猶得挹景物以流連任緩步而徜徉若乃重陰凝閉四
野雲同蒼煙大霧沒頂連根飛鳥悲鳴而逐伴哀猿長
嘯以覓羣寂寞兮中道迢遞兮前村一舉足兮顛越一
回望兮迷昏且爲歷崎嶇而上下縱呼籲兮難聞至其

方幸出谷旋驚陟巘羊腸迂迴龍門悠遠摩石蹙兮峻
嶒俯谿谷兮危棧乍屈乍伸或仰或俛急賈勇之弗遑
敢屏息而定喘李白所以興嗟於上天之難而何有於
九折之阪是蓋帝眷王公險設重門一夫當關萬夫逡
巡疇有德而當興遂授此凌霄之城闔即在大禹疏鑿
四乘八載胼胝經營導河濬海亦不能假神聖之威靈
俾岡巒之頓改維彼五丁其力伊何乃揮巨斧手擘嵯
峨挾此移山平險之能若使之束甲而橫戈應無難取
秦人之疆域而爲蜀氏之山河區區石牛糞金有幾乃

以開山勤勞壯士卒啟釁而招亂致隕滅其宗祀是固
可爲貪得者之炯戒而蜀人之愚諒不至此吁嗟乎財
役身賤利令智昏古今同慨豈惟蜀人顧此關隘之危
峻兮宜乎人之停驂而迴輪奈何往來者之紛紛兮且
如雨而如雲倘石牛在於今日兮或不惜過往而宵奔
安可以舉世之通病兮獨誚讓乎蜀人

棧道栽桑記

張廷槐

古者五畝之宅樹牆下以桑通衢之旁植榆柳以表道
是桑榆之爲用不獨可供飼蠶而並能蔭行路余任西

邑時渠岸廣栽護堤也兼資歲修多植隰壤興利也並
助女紅如武都所轄半在棧道由青羊驛接壤至蜀界
七盤關綿延二百里皆蜀秦孔道其閒多疊嶂少平原
左右兩畔悉捐俸栽植桑苗盈萬中留丈許以通郵遞
人行三載後根幹挺舒枝葉繁茂鬱鬱蔥蔥翠雲盤結
不惟可坐收厚利以資亭長里正隨時修補道路之費
而行旅負販之人當炎暑傍午時坐憩其下無風自涼
即乘騎肩輿之客遙瞻遠矚未嘗不歎蠶叢鳥道居然
吉壤名區也若夫蠶織之利此閒本養山蠶抽絲織繭

販行川廣獲利已屬不貲加之嚴楊兩太守前後勸桑
十餘年如大安陽平關以及各鄉隅所栽之桑早已成
林將來新絲再上機軸爲縑爲絹利益增倍男耕女織
戶給家饒又豈僅緣陰載道可壯郵亭驛路之色也哉

勸民種麥以濟春食記

張廷槐

嘗思業精於勤荒於嬉農民服田力穡爲尤甚古者三
時不害而民和年豐雖賴天功實資人事羌民地瘠民
貧歷來專務秋禾而鮮種夏麥往往平田種稻禾山坡
種包穀平田少而山坡廣故城市或食稻穀鄉村多食

包穀包穀收穫在九十月之間一經秋雨綿延未有不
青空者本歲雨多收成歉薄即其明驗也夫歲既歉薄
復鮮蓋藏則來歲春夏之交將何以爲糊口之計是非
急播麥種不可夫山內之所以少種麥者蓋平素喜食
包米而麪食未慣故耳以彼江淮宛豫間夏麥秋禾歲
有兩秋故民多饒裕山內歲止一秋民日以蹙一遇旱
澇荒凶立著矣爾百姓值此歉薄之秋尚好逸惡勞不
急急翻犁種麥以爲春食計入春以後必至瑣尾流離
而室廬田畝之莫保焉追悔何及除爲爾民詳請出借